

欽定四庫提要

欽定四庫全書提要卷三十四

史部八

傳記類一

孔子編年

臣等謹案孔子編年五卷舊本題宋胡舜陟撰考書首有紹興八年舜陟序乃自靜江罷歸之日命其子仔所撰非舜陟自作也舜陟字汝明績溪人大觀三年進士靖康間官侍御史南渡初知廬州有禦寇功更歷數鎮最後爲廣西經略使欲爲秦檜父建祠高登不可因劾登以媚檜會以他事忤檜意亦逮治死于獄仔字元任後流寓吳興嘗輯詩話行于世即所謂苕溪漁隱者是也是書輯錄孔子言行以論語春秋三傳禮記家語史記世家所載按歲編排體例亦如年譜其不曰年譜而曰編年尊聖人也自周秦之間讖緯雜出一切詭異神怪之說率託諸孔子大抵誕謾不足信仔獨依據經傳考尋事實大旨以論語

爲主而附以他書其採掇頗爲審慎惟諸書紀錄聖言不能盡載其歲月仔旣限以編年不免時有牽合如左氏襄公二十一年鄭人游鄉校傳仲尼聞是語也云云杜預注謂仲尼于是十歲長而後聞之知孔子爲此言不當在是年也仔乃繫其事於十歲之下殊爲疎舛又禮記儒行篇對魯哀公云云則繫之六十八歲哀公問篇大禮如何云云則又繫之七十二歲不知何所據而云然此類尤失於穿鑿然由宋以後纂集聖蹟者佳書日多亦猥雜日甚仔所論次猶爲近古故錄冠傳記之首以見濫觴所自焉乾隆四十七年八月恭校上

東家雜記

臣等謹案東家雜記二卷至聖四十七代孫宋右朝議大夫知撫州軍州事兼管內勸農使仙源縣開國男孔傳撰傳字世文建炎初同孔端友南渡遂家于衢州是編成于紹興甲辰上卷分九類曰姓譜曰先聖誕辰諱曰曰母顏氏曰娶元官氏曰追封諡號曰歷代崇封曰嗣襲封爵沿改曰改衍聖公曰鄉官下

卷分十二類曰先聖廟曰手植檜曰杏壇曰後殿曰先聖小影曰廟中古碑曰本朝御製碑曰廟外古跡曰齊國公墓曰祖林古跡曰林中古碑其時去古未遠舊跡多存傳又生長仙源事皆目覩故所記特爲簡核前有孔子生年月日考異一篇末題淳祐十一年辛亥秋九月戊午朔去疾謹書後有南渡廟記一篇末題寶祐二年三月甲子汝騰謹記二人宋宗室子故皆不署姓去疾稱舊有尹梅津跋此本無之而別有淳熙元年馮夢得跋蓋三篇皆重刻所續入也去疾考中歷駁諸家之誤而以爲春秋用夏正定孔子生於十月二十一日卒於四月十八日其說殊謬殆由是時理宗崇重道學胡安國傳方盛行故去疾據以爲說歟乾隆四十七年四月恭校上

晏子春秋

臣等謹案晏子春秋八卷舊本題齊晏嬰撰晁公武讀書志嬰相景公此書著其行事及諫諍之言崇文總目謂後人採嬰行事爲之非嬰所撰然則是書所

記乃唐人魏徵諫錄李絳論事集之流特失其編次者之姓名耳題爲嬰者依託也其中如王士禎池北偶談所摘齊景公圉人一事鄙倍荒唐殆同戲劇則妄人又有所竄入非原本矣劉向班固俱列之儒家中惟柳宗元以爲墨子之徒有齊人者爲之其旨多尙兼愛非厚葬久喪者又往往言墨子聞其道而稱之薛季宣浪語集又以爲孔叢子詰墨諸條今皆見晏子書中則嬰之學實出於墨蓋嬰雖略在墨翟前而史角止魯實在惠公之時見呂氏春秋仲春記尙染篇故嬰能先宗其說也其書自史記管晏列傳已稱爲晏子春秋故劉知幾史通稱晏子虞卿呂氏陸賈其書篇第本無年月而亦謂之春秋然漢志惟作晏子隋志乃名春秋蓋二名兼行也漢志隋志皆作八篇至陳氏晁氏書目乃皆作十二卷蓋篇帙已多有更改矣此爲明李氏綿眇閣刻本內篇分諫上諫下問上問下雜上雜下六篇外篇上下二篇與漢志八篇之數相合若世所傳烏程閔氏刻本以一事而內篇外篇複見所記大同小異者悉移而夾註內篇

下殊爲變亂無緒今故仍從此本著錄庶幾猶略近古焉乾隆四十七年五月
恭校上

魏鄭公諫錄

臣等謹案魏鄭公諫錄五卷唐王方慶撰方慶名琳以字行其先自丹陽徙咸陽武后時官至鸞臺侍郎同鳳閣鸞臺平章事終於太子左庶子封石泉縣公諡曰貞事蹟具新唐書本傳此書前題尙書吏部郎中乃仕高宗所爲官而本傳不及之則史文之脫略也傳稱方慶博學練朝章著書二百餘篇此乃所錄魏徵事蹟唐書藝文志以爲魏徵諫事司馬光通鑑書目以爲魏元成故事標題互異惟洪邁容齋隨筆作魏鄭公諫錄與此相合方慶在武后時嘗以言悟主召還廬陵王復建言不斥太子名以示復位之漸皆人所難能蓋亦思以伉直自見者故其於徵諫爭之語撫錄最詳司馬光通鑑所記徵事多以是書爲依據其未經採掇者亦皆確實可信足與正史相參證元至順中翟思忠又嘗

作續錄二卷世罕流傳明蘇州彭年採通鑑唐書補爲一卷今思忠所續已於永樂大典內裒輯刊行年書寥寥數條殊爲贅設故刪年所補不復附綴此書之末焉乾隆四十七年五月恭校上

李相國論事集

臣等謹案李相國論事集六卷舊本作李深之文集題唐李絳撰今考其書乃唐史官蔣偕編絳奏議之文與論諫之事雖以集名實魏徵諫錄之類也前有大中五年偕自序稱今中執法夏侯公授余以公平生所論諫凡數十事其所爭皆磊磊有直臣風概讀之令人激起忠義始自內廷終於罷相次成七篇著之東觀目爲李相國論事集其說本明此本標題殆後人傳寫所改偕序稱七篇今佚其一所存惟爲翰林學士時四十六事爲戶部侍郎時四事爲宰相時十五事共六十五條敘事朴拙頗乏文采謝狀賀表之類雜錄其間多與論諫無關又批答賀屏風一條宣示李栻密疏一條盛夏對宰臣一條皆憲宗之事

尤與絳無涉編次蕪雜亦乖體例然遺聞舊事紀錄頗詳多新舊唐書所未載殊足以備考核焉乾隆四十七年三月恭校上

杜工部年譜

臣等謹案杜工部年譜一卷宋趙子櫟撰子櫟字夢授太祖六世孫元祐六年進士紹興中官至敷文閣直學士子櫟與魯豈均紹興間人而撰此譜時似乎未見豈譜故篇中惟辨呂大防謂甫生於先天元年之誤而不及豈宋人自大防魯豈而外又有蔡興宗黃鶴兩家皆以甫卒五十九歲爲大歷庚戌獨子櫟持異議以爲卒於辛亥之冬不知辛亥甫年六十矣且子櫟以五年庚戌晚秋長河送李十二詩爲甫絕筆甫生平著述不輟若以六年冬暴疾卒何至一年之內竟無一詩此又其不確之證也其所援引亦簡略不及魯譜之詳以其舊本而存之以備參考焉乾隆四十七年十一月恭校上

杜工部詩年譜

臣等謹案杜工部詩年譜一卷宋魯豈撰豈字季卿號冷齋鹽官人紹興五年進士仕至太府卿嘗注杜詩行世今存者惟此譜耳篇首有豈編次杜工部詩序王士禎謂甫年譜創始於呂汲公大防豈以甫生於睿宗先天元年壬子卒於大歷五年庚戌蓋承呂譜之舊也姚桐壽樂郊私語云杜少陵集自游龍門至過洞庭詩目次第爲季卿編定一循少陵生年行跡可以見其詩法按甫一詩人耳其生年可勿深論顧諸家考究之誤有不得不辨者舊唐書甫卒於永泰二年永泰在大歷之前甫詩有大歷三年以下諸作則舊書誤矣王觀國辨之是也元稹作甫墓誌云享年五十有九王洙原叔注子美詩序曰大歷二年甫下峽入湖南游衡山寓居耒陽五年夏一夕醉飽卒大歷五年爲庚戌歲上距先天元年壬子適得五十有九年王呂所據當非妄也而王觀國云甫生於先天元年癸丑卒於大歷五年辛亥辛亥乃大歷六年豈觀國未深考耶詩人自記作詩之年月日者往往有之若並記己之年齒則惟白居易爲最詳可以

按詩作譜至甫不過偶一及之如四十明朝是之句是也然亦不能定爲何歲之作譜牒家據進三大禮表云臣生長陛下淳樸之俗行四十載故知當在天寶十載亦未可知第以大歷五數上年則甫決生於壬子無疑趙子櫟作杜詩年譜謂生於癸巳卒於辛亥蓋亦未深考也嘗譜頗詳晰雖間有以意附會處而實有不可棄者近時濫陽張氏吳江朱氏輩注杜詩作年譜大率仿此而推拓之則此譜宜爲鼻祖已乾隆四十七年十月恭校上

紹陶錄

臣等謹案紹陶錄二卷宋王質撰質有詩總聞已著錄質於淳熙中奉祠山居以陶潛陶弘景皆棄官遺世其同時唐汝舟鹿何可繼其風因作此書上卷載栗里華陽二譜而各摘其遺文遺事爲題別爲詞以詠之下卷紀唐鹿事而附以林居詠物之詩其曰山友詞者皆詠山鳥曰水友詞者皆詠水鳥曰山友續詞者皆詠山草曰水友續詞者皆詠水草其曰山水友續詞者則雜詠禽蟲諸

物蓋質以耿直忤時阨於權倖晚歲欲絕人逃世故以鳥獸草木爲友蓋亦發憤之作舊於雪山集外別行 國朝康熙中商邱宋瑩嘗摘錄其山友諸詞分爲五卷改題曰林泉結契亦取其有寄懷塵外之致也今觀錄中諸作雖惟意所云往往不甚入格然人品既高神思自別誦其詞者賞之於酸鹹之外可也
乾隆四十七年八月恭校上

金佗粹編

臣等謹案金佗粹編二十八卷續編三十卷宋岳珂撰珂有九經三傳沿革例已著錄是編爲辨其祖岳飛之寃而作珂別業在嘉興金佗坊故以名書粹編成於嘉定戊寅續編成於紹定戊子粹編凡高宗宸翰三卷鄂王行實編年錄六卷鄂王家集十卷籲天辨誣五卷天定錄三卷籲天辨誣者記秦檜等之鍛鍊誣詔每事引當時記載之文如熊克中興小紀王明清揮麈錄之類而珂各繫辨證天定錄者則飛經昭雪之後朝廷復爵褒封諡議諸事也續編凡宋高

宗宸翰撫遺一卷絲綸傳信錄十一卷天定別錄四卷百氏昭忠錄十四卷絲綸傳信錄者飛受官制劄及三省文移劄付天定別錄者岳雲岳雷岳霖岳甫岳琛等辨誣復官告制劄及給還田宅諸制百氏昭忠錄者飛歷陣戰功及歷官政績經綸於國史及宋人劉光祖等所作碑刻行實黃元振等所編事蹟以次彙敘者也其宸翰拾遺中舞劒賦乃唐喬潭之作因高宗御書以賜故亦載焉編首自序稱況當規恢大有爲之秋魚復之圖穀城之略豈無一二可俎豆於斯世檢其所當行稽其所可驗而勿視之芻狗之已陳云云殆開禧敗衄之後端平合擊已前時局又漸主戰故珂云爾也其書歲久散佚元至正二十三年重刻於江浙行省陳基爲之序又有戴洙後序稱舊本佚缺徧求四方得其殘編斷簡參互考訂始見成書故書中脫簡闕文時時而有明嘉靖中刻本並仍其舊今無從考補亦姑仍嘉靖舊刻錄之焉乾隆四十七年四月恭校上

象臺首末

臣等謹案象臺首末五卷宋胡知柔編述其父夢昱獲譴始末夢昱字季昭號竹林愚隱吉水人嘉定丁丑進士官大理評事以論濟王事貶死象州寶慶元年追贈員外郎咸淳三年追諡剛簡知柔於寶祐四年編其奏疏遺文後又益以諡議及諸家贈答題跋之作以成此書而彈文亦具載焉其編次頗無法度如第一卷封事及上史彌遠書之下忽攙以李孝先梁成大糾彈夢昱二疏及徐瑄救夢昱書其下又爲夢昱祭弟文一篇其下又以追復省劄之類共爲一卷第二卷告詞行述之下忽攙以夢昱所進劄子四篇其下又贅以趙文等所作夢昱水石圖贊五首共爲一卷第三卷諸人贈詩十八首之下忽攙入夢昱自詠步王盧溪韻詩二首再寄一首其下又載他人詩七首忽又攙入夢昱自詠榕陰圖一首其下又載他人詩十六首共爲一卷第四卷爲諸家哀詞祭文題跋而第五卷省劄諡議反居其後末附像贊六首又與水石圖贊各編而出身印紙題跋亦與封事題跋各編均龐雜無緒又其書作于宋理宗時安得載

及元明人詩文殆必其後人所竄亂非知柔之舊矣徒以夢昱氣節足重故流傳至今而宋史夢昱無傳所載亦不免闕漏今特著之錄以示表章之義焉乾隆四十七年四月恭校上

魏鄭公諫續錄

臣等謹案魏鄭公諫續錄二卷不著撰人名氏案元伊足鼎魏鄭公諫錄序云唐王綝諫錄五卷至順初下邳翟思忠爲常州知事撫其餘爲續錄二篇其書刻於元統中明初已罕流傳故彭年蒐采遺文爲續錄一篇以補其闕此本載永樂大典中綴王綝所作諫錄之後篇數與伊足鼎所說合蓋即翟思忠所續本也王氏所輯諫錄僅據其所見聞未能賅備唐書魏徵本傳所云前後凡二百餘奏無不剴切當帝心者已不盡傳其他片語單詞隨時獻納者更爲史所不盡紀此本雖摭拾衆說與史傳間有異同且有實非諫諍之事而泛濫入之錄中者然大旨明白切要於治道頗爲有補要非他小說傳記比也據伊足鼎

序稱思忠起家爲儒官曾著易傳衍太元蓋亦好學稽古之士然朱彝尊經義考二書悉不著錄蓋不特著作散佚併其名氏翳如矣茲編卒復見於世豈非幸乎乾隆四十七年十月恭校上

忠貞錄

臣等謹案忠貞錄三卷附錄一卷明李維樾林增志同編維樾字蔭昌增志字可任俱吉州安福人是編爲其同里卓敬而作卷一爲遺稿凡詩十九首序二首銘一首而冠以遺稿序卷二卷三爲後人記載題詠詩文而附錄黃養正陳茂烈二傳皆敬鄉人也然養正爲敬門人又死于土木之難其附錄爲宜茂烈與敬別無淵源而又以棄官養母終于鄉里其事截然不類附之忠貞錄中名實舛矣敬非惟死節慷慨震耀千古即燕王來朝之時密請乘其不意徙封之於南昌計亦良善其疏雖無完本然劉球列傳中尙載有其略不錄之于遺稿中亦編次之疎也敬在明初不以詩名而所作落落有氣格惜其所傳不多不

能自爲一集故仍從崔與之集例入之傳記類焉乾隆四十七年五月恭校上
諸葛忠武書

臣等謹案諸葛忠武書明楊時偉編時偉字去奢吳縣人初王士驥撰武侯全書十六卷時偉病其蕪累更撰是書存其連吳南征北伐調御法檢遺事六卷而增年譜傳略紹漢雜述四卷共爲十卷昔陳壽所進諸葛亮集二十四篇其文久佚惟其目尙見亮傳末今世所傳亮集四卷由後人採摭而成文多依託如梁父吟乃褚亮之作見於唐歐陽詢藝文類聚乃因與亮本傳好爲梁父吟事相合又褚亮姓名與諸葛亮字相近遂訛爲亮作又黃陵廟記稱昭烈帝爲劉氏亮之忠盡斷不敢輕蔑其主如是且其中亂石排空濤排岸之語乃剽襲蘇軾大江東詞其僞妄尤不待言時偉此類多所釐正較諸家頗爲精審其排比事迹具有條理可以見亮之始末其書本與陶潛集合編蓋寓言進則當爲亮退則當爲潛意然潛之詩文自爲別集之流亮之事迹自爲傳記之類難以

併爲一書故今錄此書於史部而潛集則仍著錄於集部焉乾隆四十七年四月恭校上

寧海將軍固山貝子功績錄

臣等謹案寧海將軍固山貝子功績錄一卷不著撰人姓名所記乃惠獻貝子富喇塔討逆藩耿精忠由台州進兵之事富喇塔爲追封貝勒篇古之子康熙十三年耿精忠據福建反 聖祖仁皇帝命富喇塔爲寧海將軍同奉命大將軍康親王傑書統兵討之是年至台州破賊于黃瑞山又連破之紫雲山九里寺山十四年敗其衆于黃土嶺賊將曾養性乘夜遁去遂復黃巖縣直取溫州浙東底定其詳具見宗室王公功績表傳及八旗通志中是書蓋即台人所編自十三年四月耿逆初叛至十四年八月賊黨自台州遁還溫州凡所聞見各舉崖略隨條記錄貝子以懿親受寄盡瘁行間勦逆綏良勳猷懋著其間戰功次第自不若 國史所載見於奏報者尤爲明晰賅備而貝子撫恤軍民安輯